

四庫全書

集部

欽定四庫全書

集部

儼山集卷七十三至五

詳校官庶吉士臣李如筠

中書臣劉源溥覆勘

總校官庶吉士臣何思鈞

校對官助教臣卜惟吉

謄錄舉人臣蔣雲師

欽定四庫全書

儼山集卷七十三

明 陸深 撰

墓誌銘十二

承德郎工部主事劉公贈安人趙氏合葬墓誌

銘

嘉靖十九年十月廿又一日亭湖先生劉公卒於番陽
之里第享年六十有五訃聞京朝其子洵自太博南奔

謀以明年十二月九日葬公於餘干旗峰之原將啟趙安人之藏合焉安人公配也與公同生丙申先公二十年以正德庚辰八月六日卒云洵以深知公也久乃奉文選劉君梧岡之狀來問銘按狀公諱錄字景賢更字世臣別號亭湖饒之番陽人也姓劉氏傳自漢世至宋禮部尚書忠肅公摯寔起吉水家富田鄉五世孫壽可翁自富田寓饒構積善堂以居壽可之孫雲樵翁諱琮玉字潤芳博學精天文當元季望氣知高皇帝龍興與

友人決策歸附高祖聞而物色之翁乃隱跡於醫嘗師
會稽楊鐵崖先生與姑熟陶安主敬同學最相友善會
主敬守饒遂定居番陽著述甚富雲樵生教授澄字源
清教授生御史經字季權御史生參政諱烈字尹吉以
子中丞貴贈大中大夫資治少尹配詹氏贈淑人中丞
諱城字廷高以公貴贈通議大夫為本朝名臣配董氏
贈淑人側室尤贈安人者寔生公中丞年幾五十未有
子時為福建按察副使巡汀夜夢偉丈夫來謁詰旦得

王狀元祠葺而像之以祀遂夢抱一兒謝適公生閩官舍中自幼教之甚嚴年十二而中丞以都察院右副都御史巡撫河南卒於行臺乃奉尤夫人護喪南歸執禮如成人尤夫人教又嚴遣就外傳從李用和先生學訓成端重年十五補郡弟子員即購奇書攻古文舉弘治辛酉江西鄉試明年卒業南雍與天下賢豪遊聲稱藉甚凡七上春官嘉靖癸未始第進士出知贛榆贛榆海縣也而貧荒盜相仍且一紀矣顧征求歲益增公至抗

疏免其繇十七屬淮北大饑乃即通衢設廠四十餘所作粥飼之數百里內全活甚衆尚書席公署其考曰處國事如家事視民饑如已饑會宿遷有疑獄屬公鞠之夜宿郵舍恍見若婦人者按尻褰帷如訴明日檢格以自經報公親濯骨驗之乃尻先折而後自盡法當坐者咸伏罪又一日單騎謁府途中遇鹽徒數千一見知公皆羅拜更為護十里行而散去乙酉以更賢調蒞之平陽時處有礦賊殺吏僭號勢甚張詔捕之重兵駐溫師

老財費公請釋兵獨任其事近賊土民有葉光者家蓄死士力能制賊公抵其家諭之光感泣用命乃道民兵擊賊甚力城中有惡少數輩投賊公計敗其謀賊遂殲焉光既成功因隨公并遷族於市居時上官有力者欲攘光功文致光罪死公懇曰事由光請釋光願歸公功第一又海寇艤十七艘將登岸公親禦之挽弓命中殪一人又一矢貫篙工手賊相顧駭愕揚帆去而公初未嘗習射也丁亥擢刑部湖廣司主事先是平礦賊宿榛

莽間夜三四徙遂傷右足至是以疾與告三年瘳補工部都水司管徐州洪舊例洪需取辦於州繇人獻一金以飾厨傳公至惟命人植三柳以固堤辛卯郊禮覃恩進公階承德郎追贈皆如制公感且泣曰聖恩至厚且褒及所生矣遂疏乞休再上乃允時年五十六云公家居十年口不談外事日惟教諸子以文史為適自少個儻有奇節體貌修偉氣和而色莊孝友天至人尤稱之趙安人出宋丞相忠定公之後父諱哲同知兩浙都轉

鹽運使司母恭人羅氏安人端靜恭儉能讀書結字年十六歸公迨事尤夫人孝謹備至內範肅而惠視諸媵尤夫人有愛女安人愛之倍於公嫁李榕榕故家也今為鎮江府學司訓云子男九長即洵娶戴氏封孺人次泌蚤卒娶楊氏次法娶章氏次沾中武鄉舉娶許氏次治縣學生娶黃氏次泳娶王氏次冲聘嚴氏次沚聘高氏次浚聘戴氏女五長適余休次適鄧西川次適祝奎次適姚承訓次適張文質孫男五棐棨案渠葉孫女十

深憶在南雍時見公如鸞鵠五彩翩翩然正德間以史官使淮公方績學著書滿家如殷盤周鼎龍文彌漫逮予參政江西則見公于芝山之麓矣握手談議侃侃不忘天下之大真當世之奇男子也時諸子庭列森秀若蘭玉予得偏視之退而嘉嘆予既召還翰林為學士與戊戌讀卷之列洵時以禮闈第二人對制文章高雅在第一等封上御批為三甲第一人臚傳大廷於是天下皆知劉亭湖之善教子而中丞公之有後也比洵出使

還朝予猶得問公起居縷縷詎意遽銘公之墓耶所著有亭湖稿若干卷饒郡志贛州慶陽二府與萬年縣諸志別有哲亭集梓于平陽蓋公之學甚博而正可方古名賢惜乎其不盡用於世也稍稍見兩縣者固不勝書予特志其大者系之銘銘曰

山川出雲以澤天下渥洼之產厥有龍馬雲之油油返于太虛萬里逸駕羣龍並驅嗟哉水部前承後啟還珠合劒豈曰居俟番湖浩渺芝山崔嵬用徵不朽視此銘

詩

沈母龔孺人墓誌銘

孺人龔氏以母德冠江東之沈有七丈夫子能以科第
臺諫振沈氏之宗者寔自孺人始孺人故上海家也系
出漢勝從宋南渡世多隱德皇明有尉井陘者諱某號
澹菴孺人之父也母陸氏年十七歸友松府君諱梁友
松父菊軒翁母瞿夫人事親如禮有司具聞孝宗朝以
雙孝旌其門時孺人為冢婦實有力焉既而長子炤舉

進士再遷給事中武宗朝奉使忤權閹重譴奪官會友
松訃聞還孺人倚門而泣以指數之曰汝父行誼厚且
善今不及享下壽棄而祖母背而祿養汝之目且不瞑
也言已而泣又曰汝父教汝立身成名起科第今復云
何乃爾耳則又泣炤拜慟而前微出聲曰兒無他坐不
能與時浮沉故爾今生還得見吾母如見吾父也孺人
乃揮泣曰誠如是是不失身即不辱親吾固知汝父將
含笑於地下矣則又泣曰吾非不能死汝父顧吾姑在

堂日且老諸子女幼婚嫁未畢吾恐累汝也乃相與扶抱而泣失聲孺人幾絕會炤得伸白叙官由是此言稍稍傳天下天下之人稱之曰賢母賢母云初菊軒公為江南望族族甚蕃瞿夫人在堂時子姓析居有一二里三四里者孺人侍夫人晨夕左右甘旨畢辦會卧疾牀第間孺人以一身周旋之幾二年如一日族人以此多孺人享年六十有四以嘉靖戊子五月八日卒卜以乙未正月某日葬戴溪之崇孝阡啟友松府君之墓封而

合焉孺人性至孝勤儉慈惠動有禮則七男三女皆躬
自乳哺訓誨至於成立人尤以為難云焰壬戌進士積
官至廣東按察司僉事次燿雲南永昌衛經歷次熈王
府典膳次煦太學生次炆次烱次燭俱引禮舍人其子
也典膳徐倬序班諸華監生秦文解三人其壻也孫男
十曰科曰思道曰自宜曰自立曰自正曰應奎曰應兆
曰應辰曰自重曰思義孫女十深母吳孺人之祖母瞿
與瞿夫人姑姪也僉憲君以深有世姻且通家也故使

為之銘銘曰

惟家之興粵有婦職子孫日昌乃視母德於惟孺人其
報斯食鬱鬱堂封過者必式

浙江按察司副使進階亞中大夫閭公墓誌銘
公諱睿字汝思別號三樂道人世居祁之會善里曾祖
孝先祖棟咸隱於農父靜菴諱某贈文林郎永清縣知
縣母呂氏贈孺人公生而臞靜菴委曲撫之每令於群
兒嬉戲公惟旁睨而已少從餘姚毛世達授孝經即了

大義諸童生當責世達課以句曰小水難為海公即應
曰鮮鱗解化龍世達異之初靜菴明法律筮仕為通倉
副使有政蹟稍遷上海縣稅務大使故公從來上海遂
學於校官盧先生不踰年而通禮經貫穿百家露如也
時上海令會盧於學官試之謂靜菴曰子嗣國器也汝
官雖薄有是子奚滿載歸耶會靜菴卒於官公扶柩歸
葬如禮服闋補邑庠增廣生督學使奇其文期之遂領
弘治乙卯鄉薦登己未進士第授永清知縣永清素稱

難治公至治以誠信仁禮勸農聽訟俗為之變又雅意
學校修葺考校諸生若傳堯臣劉繼先相繼登科弘治
辛酉縣蝗公發粟易民捕之積蝗至萬餘石故永清獨
不災巡撫周公以事聞有銀幣之勞縣有壽府莊窪處
不成田居民歲代輸無從敢言公覈實悉免之時孝肅
皇太后有莊隣牧場幾為所侵公疏請還之乃遣中貴
人來按公力與抗復地百餘頃中貴人譖於太后后斥
曰此為國官也汝奚白耶有事於霸州州民願借以為

守縣人急往爭之訟於撫臺都御史洪公曰是當作風
憲官耳非郡縣能留也滿一考進階文林郎例得推恩
贈及父母已而檄召當去永清民遮留不可得至欲建
生祠公堅卻乃止瀕行遺一履掛縣門從民願也正德
辛未流賊至郊賊首齊彥明者公舊禁卒也感公德繫
馬數匹於門望堂泣拜而去時巡撫毅齋李公寄詩云
強暴思恩曾繫馬市民懷德願留靴蓋紀實云既入朝
試陝西道監察御史巡視北城正德初元事務紛更公

直言無忌有侃侃風奉敕查盤甘肅諸鎮倉糧糧多虧
折官皆鬻妻子償之有自經者公革兜攬之人禁兌給
之弊設法取盈釋淹滯之官凡六十輩舊例官軍馬斃
所司責其人貧者至典妻賣馬以應因循成俗夫婦倫
乖公命屯地每頃出銀一錢以給買馬仍嚴典妻之禁
嘗經祈連暮宿山下夜分聞金鼓聲比曉雪滿地公詢
諸左右曰山徑冰滑非雪馬不可度山後有霍將軍廟
蓋神助云公入廟祀之廟下有池出冰若榴梨瓜果狀

衆咸以為公所感云暨復命疏邊務數條上皆嘉納諸鎮至今行之遂命巡按陝西時逆瑾擅權凡公出者歸必厚賂不然輒加譴謫公曰寧禍吾身不忍剝吾民也寘鐫之亂寔遊擊仇鉞有功逆瑾欲歸功於鎮守總兵曹雄雄瑾親黨也公上疏別白之瑾怒遣錦衣官欲假他事逮之未及而瑾敗公獲免未幾陞浙江按察副使奉敕巡視海道海接東南諸夷設憲臣為備自逆瑾裁革之後倭寇乘時劫畧勢要開洋覓利公既至水操艦

戰豪右歛迹海道為之肅清歲甲戌以疾致仕歸祁優
游田野之間芒鞋丹服號晉郊耕叟云暇日讀書猶不
輟視世務漠如也辛卯冬忽嬰疾疾既革亦從容談笑
殊無苦諸子請後事勗以勤儉耕讀福善禍淫之道賦
詩一章曰一輪明月照祁川虛度光陰七十年今日收
光歸去也海天皎潔十分圓端坐而逝寔壬辰正月初
四日也距其生天順辛巳五月五日享年七十有二公
性敦直宦遊二十年以清白自持家居衣食澹薄宅舍

僅蔽風雨人無少長賢愚皆誠心禮接凡族人親友貧不能婚娶者輒出貲濟之友人王佑卒官於廣昌尹樞還家貧子幼得公而葬其仁厚類多若此性少飲酒而善吟咏有晉郊集若干卷配劉氏封孺人晉府百戶劉鑑女有賢行子男五師善娶郝氏師賢娶陳氏師良娶王氏師文娶武氏師德娶馮氏孫男十紹芳繼芳繩芳聯芳緝芳纘芳綿芳維芳縵芳繹芳曾孫男五講論詩談女二長適郝廷佐次適許登仕女孫一嗚呼公今之

古人也世豈多見哉歲戊寅為御史朱寔昌所薦嘉靖
丁亥今上推恩之詔進階從三品云深故家上海童子
時見公與先兄輩同學業既待罪史官有事於浙會公
憲臺出督學於山西公自祁來逆我于榆次情好藹然
予再適晉而公卒矣嗚呼辛丑之歲其子縣學生某走
京師以葬期告而乞銘乃按方伯郭公韶之狀誌而銘
之銘曰

晉山葱蒼惟祁孔良惟公祁產家瑞國光內臺外臬風

紀載揚挂冠何早脫屣何長援毫揮手與化偕忘是曰
君子之藏祚脩其昌

儼山集卷七十三

欽定四庫全書

儼山集卷七十四

明 陸深 撰

墓誌銘十三

監察御史鄭公墓誌銘

嗚呼思齋歿且十載矣始克葬而予始克誌之於人世
何如也嘉靖癸卯冬鄭生開自莆陽走海上再致遺命
復奉王大參應時狀并以葉方伯鳴玉書來速銘二公

端人也予發書而泣嗚呼悲夫士君子遵一王之制以興履正途修正學適當聖人御極乘可為之時而又有能為之具顧其所出才十一爾而遽尼焉竟齋以逝嗚呼予於思齋能不悲乎而繼之以泣也按狀思齋名洛書字啟範姓鄭氏出南湖唐太府卿露倡道于莆四傳至刺史肇徙楓嶺生倉曹楨楨生靜邊都統帥瑄析居待賢里之桃源至元泉南提舉朝避寇徙郡學之前其八世祖也高祖貴八曾祖再一祖廷輔再徙郡治之前

皆不仕考諱祥號近菴正德丁卯鄉舉授電白教諭母
林氏九牧旣公後實生思齋思齋初生時適鄰家曝書
龜跌移因命之名自少岐嶷異凡兒教以古歌輒成誦
稍長治經章解句析師宿以為賢已年十四應省試還
補郡弟子員提學東泉姚公試郡數百人中拔寘第一
時年十七也丙子舉于鄉丁丑舉進士觀政廣西道奉
例歸省蔡太君子家明年始覲于電白會廣中兵亂難
仕百力營衛近菴以歸嘗過江門拜白沙先生祠因登甘

泉湛先生之門折衷理性之學甘泉器之時有黨陸伐
朱者極力排辯嶺南人士亦貼服云時王改齋宜學舒
梓溪國裳兩內翰謫居亟稱之不置庚辰赴銓授上海
知縣上海東南劇縣也素稱難治思齋治之以慈惠若
有神明然每事事抵日是則垂簾屏坐鼓琴誦詩以自
適或退而引諸生論經史月徵季考時其勤惰而激勸
之嘗曰為學不以聖賢為邦不以仁讓非士也士多成
美才海故健訟庭下常數百人詞入悉受而遣之聽自

息有不息徐為數語折之即皆引伏又曰民之爭禮之
廢也乃計家為里里有長計里為鄉鄉有老選高年有
行者充之朔望則里老率其鄉人子弟行揖遜禮講書
歌詩錄善紀惡海多火葬又曰此非民之罪也令之不
德也為立義塚明表樹定禁約以示之習尚浮靡六禮
過制且婚無載書易速于訟為之詳品節定書式令社
學師掌行之遂建社學九十六區隨學建倉為之約正
司馬準常平之法適歲太歉倉且不給乃大發賑之時

饑民相攜來歸者萬計雜沓無緒為之法制別以都里
列以交衢識以旌旗散以僚吏金穀封裹坐衆而即之
授受以手焉論次鄉賢名宦修葺社稷壇墀祀典咸秩
更定邑志文獻以章海賦久弊始議以三鄉田為三則
稱土而均撫按咸是之奏上而未果行其說猶存嘗於
履端謁郡歸泊海口下有沉屍壓以石磨忽見之嘆曰
此必客死故莫余告也遣人偵之近村民家有石磨失
其牡執來合之為一即訊乃伏果江西賣卜人歲晏將

歸房主利其財而殺之又一夕舟行見焚屍者詰之曰
吾嫂也姑隨俗爾數日有告母死無歸者因憶向日道
見火而不哀豈其人耶因逮來集諸隣保訊之衆云此
家無喪亦無嫂乃告者之母暮行被殺而奪其首被發
其家藏首被一一具在有懷金渡海者舟人沉之其家
不知也旬日告發乃盡呼舟人其一已移之他渡即令
解其首帕密遣示其妻問金妻果以金至囚乃伏諸如
此皆麗法抵罪無拘吏文邑人稱快初不以為功也又

罷勾查以益軍匠禁賭博以感游惰毀淫祠以人巫覡
表節義以獎人倫懸鐘磬以達幽隱當道才之以卓異
交薦乙酉春召為河南道試監察御史巡視京倉九月
實授巡按通州丁亥九月選推提督南直隸學校計立
臺之日僅三十三月而章凡四十七上其論治心修身
之道者五事勸上廣仁恩以惠京師者十事救災求言
復上十事皆剴切語多不載至論逸欲之戒有曰陛下
觀於御馬可以求御民之道觀於使舟可以求使民之

道劾費少師張詹事之交惡有曰失近臣守和之義乖
明時雍穆之風二臣宜罷論調停器使之說有曰過為
區別則才能何以自容每事紛更則法令何以專一開
大臣薦舉之門者將移威福之漸破條例資格之常者
必啟奔競之路悉荷上優容采納其薦達臣工也如大
學士楊公一清兵部尚書王公守仁彭公澤宜以軍旅
禮部尚書羅公欽順吏部尚書楊公旦戶部侍郎邵公
寶國子祭酒魯公鐸宜以簡任其勲德耆舊也如大學

士謝公遷尚書林公俊孫公交宜以眷禮其救解過誤也如總兵馬永之革任御史魏有本之調外給事中楊言之下獄鄭九萬之瀕死郎中葉應驄之就逮主事繆宗周唐樞之編管皆一代之偉人名士士論韙之既奉敕陞辭而南過徐聞近菴公訃號慟兼程歸治喪如禮已丑葬太君近菴於南寺月峰山明年壬辰終制赴闕補浙江道兼理廣西江西諸道所至振舉名日益起而忌者日亦益衆時方考察京官適在當局會有互相糾

劾之命給事中有失官者訐奏上特旨報罷而思齋歸矣道吳舊治士民相攜徒步送百里號泣攀挽者載路既歸甫以明年甲午閏二月十一日卒于家年三十九耳遠近莫不痛悼之娶葉氏方伯女弟明惠肅慎忠廉之助居多子男二長即開側室方氏出也娶黃氏主事文炳之女早卒次閭丘氏出早殤息女一許配林大尹成立之子卜以某年月日葬某山之原思齋天分極高以氣節自負所與交游必海內賢豪士非其人雖貴顯

不顧好辯有口喜稱古昔先王明習當世之故廣庭羣
議善批屈人卒亦以是自屈云念深昔在正德丁丑春
試有事於禮闈與一二僚友相約期得名世士思齋經
房出今大學士介谿嚴公公以示予類批讀其文擅場
之作也以呈兩主考閣老戒軒靳公學士東江顧公共
咨嘆得之晚不及梓文為惜會出令海深時居先詹事
公憂目睹三年之治咸覈思齋謬以予為知己若不忘
吾海也故予志海事獨詳而應時所為稱述者數千餘

言自當傳信云思齋文翰精麗所著思齋集若干卷藏
于家為之銘銘曰

玉扃迺折瓦墁獲完刳方屈直物則有然君子之守寧
曰毀全簞瓢為壽鍾鼎非年烈烈御史電白不死國之
忠臣家之孝子餘慶實多貽厥後嗣徵我銘詩以閔千
祀

進階亞中大夫黎平府知府郁公宜人王氏合
葬墓誌銘

嗚呼是為直齋先生郁公之墓昔在弘治間文治極矣
有起自東海之上以一經魁天下者公實先登蓋一時
之盛也茲以嘉靖癸卯冬十二月某日葬公于榆木涇
之原其孤夢麒禮服徒跣奉唐憲副龍江先生狀來乞
銘誼不容辭正德初公為御史在浙江道龍江為給事
中在兵科深待罪史官在翰林同朝同鄉又一時之盛
也嗚呼公可以不朽矣公諱侃字希正別號直齋晚號
嵩陽山人志本始也蓋其先從宋南渡徙居上海之烏

泥涇故今為上海人五世祖德達高祖文富號菊隱曾
祖愷號筠軒祖蒙號月坡世有清操以行誼望于鄉逮
松坡府君諱瓊始以進士業補縣學生蔚有文譽以公
貴贈奉直大夫南京禮部儀制司郎中配周氏贈太宜
人生四子公其季也自少穎敏十歲能屬文出語輒驚
其長老大理卿王公景明與松坡府君同學友善每見
必竒公松坡亦以吾久淹場屋振吾業者必此子也已
而疾將革連聲讀書屬之公頷而刻厲益勤遂遊舅氏

周侍御之門學成而博洽選補縣學生諸提學使者試
文必奇絕恒以掄魁期之辛酉領應天鄉試壬戌第進
士觀政禮部初授行人奉使徽府王器重之戊辰選授
監察御史監稅蘆溝有才名既奉敕兩廣稽覈糧儲疏
上四事武宗嘉納焉值逆瑾干政辛未出判安吉州適
有湯氏之變公皆先料潛消地方安堵壬申量遷開州
知州乃崇禮教修武備豪右為之斂跡時內翰何公塘
名士也與公同僚懽甚甲戌遷南京刑部員外郎公色

喜遂將母之志即迎養太宜人于金陵公素精法比明
允為諸司冠有指揮某傳襲曖昧公發其私證左辯甚
人以為神明明年奉太宜人喪還渡江驟風公泣禱而
霽人以為孝感戊寅二月終制赴闕補南京儀制司郎
中會武宗南巡駐蹕金陵一切禮文皆公手所裁定權
倖毋敢干焉辛巳二月調禮部主客司郎中多所釐正
具疏乞汰冗員宿弊為之一清然仇怨側目矣本年七
月遷潮州府知府潮俗獷悍公治嚴明果信人心貼服

暇日集諸生講授經義咸稱得師毀淫祠秩正祠士風
為之一新上官有出令妨民者皆停閣不報勢豪禁戢
以法律故多咈意而謗讟興矣會朝覲例移知黎平公
曰黎固仕邦也若猶吾潮吾其歸哉因上疏乞休時白
巖喬公為太宰深知公而聽之遂歸歸務高居厚養結
社賦詩為樂不以世務嬰心教子課孫動循禮憲藹然
文儒之宗鄉邦倚重焉既厭城市乃築別墅於吳江之
爛溪杜門簡出時具輕舟眺覽於水光山色中悠然有

自得之趣暮夜猶張燈讀書不輟戊子聖天子以祀典
覃恩詔進公階一級公感恩稔每念國本所繫乃上疏
請稽古建壇秩祀高禩以祈皇嗣時李文康公在內閣
亟稱其退不忘君有餘忠焉丁酉秋命子夢麒二孫恪
性應試兩畿忽遘疾以八月九日考終于正寢餐年七
十有三配王氏贈宜人太平守易菴先生女明慧貞淑
通孝經烈女傳大義易菴鍾愛擇配得公文大奇之既
歸公孝敬勤儉事太宜人曲盡顏志生夢麒年三十一

而卒繼董氏大理少卿中岡公之姪世家嫺則習書翰
知大義手撫遺孤備極慈愛太宜人尤賢之年闕而

卒再繼吳氏大僕卿

闕

公之孫孝姑慈幼內外無間

言公敷歷中外內相之力居多皆次第從公於俞原禮
也今繼俞氏封宜人蘇州衛指揮友山公之女有賢行
子一即夢麒績學修德以世其家娶曹氏廣西僉事錦
溪公女三女長董出適戴憇次吳出早卒次俞出嫁周
式尚書白川公之子孫二恪娶唐氏性娶孫氏俱國子

生孫女一曾孫二元吉貞吉曾孫女三嗚呼公素英傑
以直道自居遇事議論風生黑白不爽文章追踪古作
者六朝以下勿論也事業欲與韓忠獻范文正相許與
貌不踰中人而膽氣磊落見者企服晚乃抑損恂恂辭
意溫雅務為睦宗厚俗之舉親之者咸欣欣然若負暄
焉深辱公厚善且同舉於鄉嘗相要約以自見於世者
多不能酬然公之器業凡三四變最後乃粹然云宜銘

銘曰

古三不朽得一者傳公所樹立有功有言其言維何高
文大科其功維何州郡省府詩云德輶公克舉之太上
無名視我銘詩鬱鬱若堂過者必式相助多賢永同此
室

廣東布政司理問王公配侯孺人墓誌銘

東海之上南浦之陽厥有喬木故家實維王氏積德好
誼蓋自宋南渡以來凡幾世矣然皆以隱操高一鄉傳
至怡岡公始以文學起家屢試場屋晚乃隨例貢入太

學既而循資試天官名在高等得選廣東布政司理問
所理問賢於其官滿兩考遂致仕歸奉八十之親者
數年甚樂焉以嘉靖甲午年六十有三卒配侯孺人從
公歸自嶺南後五年己亥年六十有八卒嗣子誥乃緘
狀來乞銘先是怡岡之葬予許銘屬有萬里之役未償
也及是孺人之訃予益感悼又重予兒女之悲乃發舊
稿併叙之嗚呼予忍為此哉嗚呼予忍忘此哉殆有數
存焉公諱寅字正之怡岡其別號也父諱袞字九章號

檜亭以孝友詩禮聞大江之南母談氏系出宦族慈惠敬慎祖諱某字某號南浦祖母某氏曾祖諱某號漁樂曾祖母某氏高祖諱某號槐雲高祖母某氏初里中有好善人人稱王佛子者是為養靜處士養靜實生槐雲養靜之父為友文處士則王氏始遷之祖云怡岡少勤敏家業益豐瞻檜亭公特鍾愛之躬行孝友聲稱籍甚其居鄉也敬老禮賢賙窮卹匱一時習俗多為之轉移其守官也敬事奉公初不以小大難易介其意動欲行

志嘗一署新會縣事剖決無滯覈處梅嶺分疆商稅量
劑有方撫按特以禮待人皆多其才而又惜其用之不
能盡也孺人系出郡之官族坦齋司訓侯先生諱平之
女也母某氏少嫺家範有淑德初怡岡為坦齋館甥已
偕孺人歸事檜亭公暨奉談孺人左右孝養備至乃至
睦宗逮下閨閭之務俱斬斬有條理一洗綺紈靡侈之
習而王氏之澤益以衍裕一族稱賢無間內外故其歿
也人尤哀之子男三長曰誥娶梅氏繼莊氏初誥生有

美質予以仲女許為配及笄而歿仲女賢甚故予淑人
每見誥未嘗不思女而涕從之梅氏之繼實淑人之姪
也次曰訥側室王氏出聘張氏次曰誥側室許氏出息
女一適何良臣孫三廷佐廷佑廷仕孫女三誥卜以嘉
靖十八年十二月吉合葬沙岡之原又明年夏五月予
在京師追書為銘使誥納焉以極予死生之痛銘曰
生以澤延配以德偶望以才克世以仁後嗚呼長江橫
前九峰列右是為怡岡之藏而王氏所為不朽

贈徵仕郎中書舍人隱西張公墓誌銘

尚寶丞張君電有母沈之喪如例以終制請今上皇帝
特旨留之許以三月奔歸即起供職復以給驛請上又
允之蓋殊典云電感泣廷辭就道乃過予以告曰電辱
公指教以有今茲門祚之榮實徼福焉惟是歸葬期嚴
先人之封願得公一字埋為銘予不忍辭乃按孫中書
墀所為狀叙之曰公姓張諱昂字以周隱西其別號也
世居松江之華亭元末有諱國英者避兵海上因家焉

國英生壽昌壽昌生中善中善生森森生公公性至孝
讀書循禮侃侃有執持善處淡薄尤不能媿阿取容於
俗人有弗合理者雖廣座中輒指斥不少貸故鄉黨以
直亮服之內外諸族人皆嚴憚如父師然年六十卒葬
澧涇之阡嘉靖十六年丁酉三月初一日遇廟享恩以
電貴贈徵仕郎中書舍人公初娶陸氏生一子曰霽繼
娶沈氏即電之母也受封太孺人太孺人出上海舊族
父諱鏞貞懿慈順不喜華靡事中書公竭力養二親俱

躋壽康撫霍如已出初舉電有奇質愛之無所不至既而電遭遇聖君以文墨進御一時才俊無能出其右者漸致顯融館閣諸大老咸加器賞是歲秋奉使便道歸省太孺人於家舞綵上觴光動桑梓環海之人咸嘖嘖歎羨此邦之所無亦近古之所未聞也以己亥十二月十五日考終正寢得壽八十云卜以庚子五月十一日將啟隱西公之藏而大封焉子男二霍娶王氏電娶龔氏女一夏深其壻也孫男二守繩娶王氏守經娶姚氏

孫女三曾孫一子蚤識司丞世同里閭故特書其大者
系之銘銘曰

宗黨稱善于野則同隱逸之操有古人風載啟其後文
雅鉅公國恩天與歿贈生封珠駢劍合氣若長虹孰是
不朽惟孝與忠蔚哉斯丘大海在東

儼山集卷七十四

欽定四庫全書

儼山集卷七十五

明 陸深 撰

墓誌銘十四

省軒莫先生墓誌銘

壬寅冬十一月七日癸丑鄉貢進士省軒莫先生卒於家嘉靖之廿有一年其子南京工部主事如忠予告歸養之明年也又明年癸卯冬十月癸酉卜葬於二里涇

祖塋之次如忠率諸弟匍匐走上海乞銘予諾焉按狀
華亭之莫氏自正二府君始居胥浦鄉正二生慶一慶
一生真一真一生文通皆修隱操文通乃遷郡城之穀
水坊而莫氏始大文通生勝勝補庠生用歲貢授官北
京虎賁衛經歷滿考得敕贈及父母而莫氏始名郡中
矣勝生昂昂生昊昊字宗大號一軒以尚書學有聲一
時登成化癸卯應天鄉試第二仕東昌府通判卒配嚴
氏繼強氏生六子而省軒行第三諱愚字汝明別號省

軒省軒生而明秀長贅廣東僉事竹坡朱公昂內外咸
有師承名益起亦以書經登應天癸酉鄉試凡八上春
官年五十有六而卒配朱氏子男四長即如忠登嘉靖
甲午順天鄉試第二繼舉戊戌進士高等娶富氏四川
按察副使好禮女繼楊氏山東按察副使儀女次如信
縣學生娶姚氏工部主事參女次如德府學生娶韓氏
側室吳出次如爵陸出尚幼息女二長嫁王諤次唐氏
遺腹生孫三是龍是驥是騏嗚呼吾松素稱文獻多故

家舊族然三世兩魁中有啟承之士俱守一經宛然西漢風誼信未有若莫氏之盛者也省軒嘗以經綸望其後而如忠之功業方發軔康衢惜也省軒齋志以早世吾郡斯文為之出涕况相知如予者哉予憶少時出見郡先輩皆卓卓自樹立風儀學術足啟後來繼從諸生為舉子業一時所與游者咸雅馴動遵經傳未有浮華靡麗之習如竹坡公子同年友也及見省軒尤愛之而予遽銘其墓耶嗚呼悲夫嗚呼悲夫省軒孝友天至事

親咸有禮度素以天下事自負諳練世故明習法律思
欲見之一世自倡義厚宗祀享交際之義內外親疎之
辯下至樹藝孳畜米鹽之細舉籍有經緯而又盡取古
今家訓門範可行者條列以示來軌其於天官星歷皇
極經世律呂書獨為深解策算了了故尤有心計而莫
氏益昌且繁矣嘗曰周官一書規模宏闊然至於羽毛
鱗介之微區處甚密是獨不宜於家乎又曰兒曹勉之
且夫君子得志則有民社之寄而憂不得志則有宗枋

之寄而憂孟子之論生道憂患為先使天運不積生人之理息矣東南膏沃民易以逸故多不才以驕侈敗族所習非也兒曹勉之又嘗喜誦老氏言聖人執左券而不責於人故處世多陰厚無求知於人故知者鮮矣予故具見之比聞如忠泣道復如此此豈經生舉子所為空談也哉予重悲之乃叙論其大旨誌之并系之銘銘曰

家聲之舊於我乎傳世澤之有於我乎延海山左右若

封乎萬年

處士南溪朱公墓誌銘

處士諱暉字文采別號南溪華亭人也按朱氏其先出
亳之永城漢有朱詢者行相國參軍事傳至孝友先生
諱仁軌以德義聞于唐宰相敬則其弟也自宰相傳五
世為茶院制使諱華成守婺源因居黃墩又傳九世諱
燾者宋徽國文公兄弟行也燾官饒州教授又為饒州
人自饒州又傳五世諱素者仕元為松江府推官乃樂

華亭風土居之故今為華亭人推官生祐之武舉進士
祐之生信國朝永樂中仕至工部營繕郎中郎中生迪
簡迪簡生交號南莊有隱操壻於泗涇之李孺人寔禮
部員外郎宜散公之姑也生三子季即處士初南莊公
依李以外家業不當別業西居落落不屑家人事處士
奉之治爨值歲饑斗米百錢處士有心計而孝凡奉養
畢具雖甘毳腴腴之物隨須而辦父母亦不知其所從
也南莊喜飲酒李孺人每止之處士內順母心外私釀

以進故雖以酒困乃其心固不頽然樂也弘治間詔令
民間葬及時適南莊以脾疾卒當盛暑勉力襄事如制
既乃廬墓而以所居讓其兄兄卒無後復養寡嫂終其
身鄉里稱之凡義舉必曰朱處士南谿南谿云南谿賦
性雅淡無所嗜慕獨嗜善慕義若不及處人不設城府
處已惟以理自勝好交海內名賢館待無倦當泗水之
匪擇勝作駐春堂復哀先世敕誥凡九通建寶敕樓近
樓闢圃蒔蔬種樹水竹翛然極盤桓之趣忽一日慨然

嘆曰吾憶廬墓時僅僅容膝今堂構軒豁畝鍾之田可
備魚菽之祭有子學文人生可矣遂不復事事以嘉靖
廿又一年六月二十日考終於正寢距其所生庚寅歲
十月三十日得壽七十有三配孫孺人無子乃懷仲兄
子子之名曰承順側室徐氏生三子長曰承益次曰承
緒季曰承祊承順以文學倡諸弟有能詩名承益以縣
學生上成均成緒總家政承祊舉應天丁酉鄉試出後
竹坡僉憲公既而攜歸著繼祀不繼產之說鄉黨是之

會巡撫陳公祥據禮曰昭穆也治命以愛竟立祊南谿
乃戒祊曰繼產母多取余志也承祊兩從之孫四人朝
賓朝賢朝賚朝質孫女二卜以某年二月廿二日葬于
顧宗湮從南莊兆域禮也承益等渡濤江走千里乞徐
奉化伯臣狀來問銘余嘗登九教堂徵故家之文獻覽
觀于泗上愛之西環九峰若畫泗水匯其南澄碧映空
可酌焉忘饑此風人之所詠也加以勝國遺老隱逸之
區流風餘韻猶有存者是宜詩禮之胄託以引長焉故

處士以南谿自表見蓋素尚云宜銘銘曰

古稱仁里亦曰華宗有偉朱氏長發自公漢唐苗裔洙
泗會通地因人勝派以源同嗟嗟南谿有古人風既承
既啟乃衍乃豐詩禮文物允肇我躬席珍邦寶厥功則
崇百世貽燕孝友敬恭詎曰不試隱約為工抱璞孕秀
善始令終過者必式若堂之封青山翥鳳黃浦游龍示
我銘詩以閔玄宮

九槐喬君夫婦合葬墓誌銘

太學生喬大登諱禾別號九槐子上海人也上海舊家
稱山喬而喬後為盛大登喬氏之良也大抵南土喜工
文華而於世務若不屑其在門閥者尤甚獨大登自少
穎銳讀書業文之餘即留心治理故凡錢穀田賦書算
法律米鹽布帛等等精練雖居積貿遷奇贏十一咸能
操切至於土木基構鐵石瓴甍之細尤善心計是故堂
室整潔園田部分悉有法一時號稱饒裕而喬氏益大
焉使得效一官當一職移家於國必有富庶之績不至

頽闌叢脞匱缺經費以妨公上固理治之才也年僅五十有六未及注選而卒予旅食于外聞而惜之惜也才如大登不一試以起鄉士之陋何耶予既歸田思見大登而不可得矣嗚呼悲夫嘉靖癸卯冬其孤承嗣承慈以墓銘請予諾焉乃發狀論其世善乎徐南湖御史之言曰海上世望巨族不減百十至有鄙田舍翁過分溺奢欲萬萬不恤也非舛也耶故人子能知難痛心者可與述孝矣讀斯言也則大登貽謀端雅益可惜哉豈徒

有才云爾按喬之先有彥衡者自鶴砂遷于邑再傳而
為止菴翁諱巖字鍾良配徐氏生三子大登其季也孟
仲蚤世大登卓卓自樹立淬勵從師學成三試弗售時
止菴翁年且高援例入太學從太學試又弗售乃謂其
友曰吾屢蹶固知尺寸實應舉之式士不求合難以速
得志也娶湯氏雪懷君之女都憲公之孫也有賢行善
相起家初雪懷見大登所為文愛之而女焉因贅于湯
逮止菴卒乃攜湯孺人歸共止墓舍力苦以襄事時屋

止數椽身無重衣家產落落君笑且慰曰丈夫不克自
奮乃望先人之遺天下豈有徒享榮富者哉故止菴遺
蓄悉以讓諸大兄乃夫婦夙夜勤勞為之二十年始作
家祠揣溝洫營第宅為子孫經久計平生尚氣岸重大
節不下疆禦刺刺慨慷多作遠遊為忌者中傷遜避僅
免嘗語人曰君子修正不蘄立名名自歸不蘄遠毀毀
自去吾遑計焉海內縉紳聞而避之家居整辨內外語
言不妄出入一以教子為事延師豐館程課尤嚴然以

有口忤當道竟得重譴踰年遂卒湯孺人繼亦卒鄉邦
悼之子男二長即承嗣娶朱氏尚書絳溪之孫次即承
慈娶朱氏御史青岡之姪孫業舉向學可世其家孫男
二長守約承嗣出次伯驥孫女一聘唐懋義皆承慈出
卜以十二月二十日合葬于沈家濱之原宜銘銘曰
嗚呼九槐瓊林一枝少予知之長子才之卒予銘之後
千百年尚有遺思嗚呼九槐其深藏之

處士西莊王公墓誌銘

正德庚午十二月丁酉望葬我西莊王公於高昌里之
北原其子太學生淮率其弟瀛洲踵門其孫相堯捧狀
泣以告曰先君葬有日矣願賜之銘深自冠年與淮友
善同攻進士業同寢處公時館穀之勗以大就既得官
京師數書候問不幸以憂還復來弔慰方圖所以報公
者而公不可起矣嗚呼銘非深誰為按上海王氏有諱
谷真者公之高祖考也妣孫氏諱璘者曾祖考也妣陳
氏諱翼者祖考也妣魏氏實生友號道正有行誼名公

之考也妣陸氏生公諱銘字敬言別號西莊初娶江氏
繼姚氏林氏子男四長淮娶郭氏宋氏為江出瀛娶康
氏洲娶孫氏姚出後弟鎧為林出女二嫁曹鶴蔡和孫
二長即相堯次相文以正統癸亥六月十七日生正德
己巳十月二十二日卒壽六十有七云公天賦厚龐涉
獵傳記詞貌清修以憲度自持尤善生殖手致者萬金
然能周人之急勇於出財宗族之孤寡貧乏待以衣食
者數家架梁築道焚券如是者又歲數數為之為之者

必於義必不為者必不義也其行大都類此中歲厭廛
居築西莊別業以游佚君子賢之曰西莊而不名嘗輸
粟賑邊得品官服非其好也惟教其子孫必以科第顯
行及矣而不待豈有數也哉為之銘曰

惟典好禮著魯論君子有穀貽後昆公蓄斯厚發必蕃
誰其舉之子若孫謂予不信視茲文

儼山集卷七十五

欽定四庫全書

集部
儼山集卷七十六
九至

詳校官庶吉士_臣李如筠

中書_臣劉源溥覆勘

總校官庶吉士_臣何思鈞

校對官助教_臣卜惟吉

謄錄舉人_臣蔣雲師

欽定四庫全書

儼山集卷七十六

明 陸深 撰

墓誌銘十五

先孺人墓誌銘

嗚呼孺人天下之賢母也雖然哀吾孺人之不及於養也孺人志不在養痛深之未有以養吾孺人也於京師卒卒之日自少師閣老李公而下咸臨奠焉深即日解

史事扶柩還還之日自閭里能言而上咸迎哭焉既殯
殯之數日親戚之疏者遠者自百里外咸持紙錢來哭
曰以是報孺人之某惠某德也而人未之及知也嗚呼
斯非天下之賢母也耶孺人姓吳氏蘇之嘉定人父諱
寔母姜氏蚤失恃年二十三歸竹坡先生為繼室逮事
筠松府君尤夫人府君夫人性嚴整獨孺人時時可其
意閱三十年無間也前孺人瞿子曰沔甫九齡孺人即
予之時再舉子一舉女皆不育年二十八始生深又六

年生一女曰素英八歲死竹坡先生喜遊南窮相沅北
走燕齊晉魏之墟或歲一歸再歸或間歲未歸孺人奉
府君夫人以居早作晏息課男耕田女織布農月僮婢
俱出親為之浙米於甌實薪於竈抵暮策其雞豚之入
命長老僕行藩外視牛圈縱犬鑰戶退乃坐南牖下張
燈或時乘月紡木綿坐深於膝旁使之讀書漏深乃罷
明早升堂視饌畢鄰之貧且急者族之不能衣者食者
有災者悉來告告則各如所欲給之不給則解裳衣捐

笄珥以繼故家雖饒而黃白綺縠之飾未嘗留也府君有男五人諸孫無慮十數率聚而教之孺人從中館穀束修筆硯費咸經理之如是者歲以為常是故過於勞勩恒苦多病深年二十五謬舉鄉試明年壬戌會試下第還業南雍是時孺人春秋五十餘兩少兒曰溥曰博育之既長矣遂奉以往蓋思欲以江山巨麗之觀紓其早歲勤劬之過也於是登巨艦道五湖遡長江以達乘秋霽無風濤之險孺人喜津津曰吾願也然居南雍再

歲再病病輒死乃甦甲子之春遂奉以還明年乙丑深
舉進士入讀書中秘例得攜家益思大其桑榆之樂又
迎之以最小兒博侍來京師居少間又病如南雍丁卯
冬深蒙恩授官翰林編修孺人得報曰是鮮政務當乞
一假還覲汝父吾從汝而南吾夢寐故土也涉春歷夏
日就羸憊既亟乃曰汝無冒時禁詒汝父憂吾雖病無
苦也竟不起嗚呼深之罪尚忍言哉實正德戊辰九月
二十四日也上距所生正統己巳十月二十八日適六

十云今卜以己巳十二月十五日奉窆於洋涇之北原
從祖塋也深不孝既未能徧走當世之鉅公以乞書孺
人之藏不敢私叙懿美以瀆孺人之終於是乃收血而
誌之不忍銘

京女誌銘

余客南都癸亥以七月哭吾女四歲者明年三月哭吾
兒兩歲者今丙寅客北都亦以七月哭吾兒八日者十
月未盡一日吾女京姐又死且三歲矣余又哭之三年

之間四哭子女於客舍生世果何如耶嗚呼將兒得於
天者素薄耶將醫藥失調耶將余之德不足庇兒耶將
生死禍福壽夭富貴物自取之而天不與耶其不然耶
先有人妄傳兒死抵家吾父亟以書來問吾發封吾母
聞而解之曰死當得生爾書後數日竟死是果偶然者
耶非耶兒聰慧百出已能誦五七言詩詞數十首每使
歌之蓋物之不長者大抵然也不欲悉識特識余之悲
而埋之天壇之南銘曰

父陸母梅家在海月生在酉死在亥甲子迄寅歲三改瘡疽遍體紫蕾蕾宛轉可憐痛百倍南郊南原阜且塏松棺布衾祭以醢速久深藏慎勿悔

清女權厝誌

女清年十三病瘡死於京師瘡凡歲餘更數醫竟莫能治最先治者陳寵寵醫京師有名也當其時夏腸中有聲乍寒乍熱寵診之以為氣虛有積以阿魏丸餌之既微有形在左脇下以為瘡也有胡某者都人也以治瘡

名榜于通衢曰半日取效亟使視之曰痞良是是名女
得男疾法當下下之與之藥即阿魏丸自是常服阿魏
丸而病愈甚吻渴減食膚黃變幾殆是時也產醫者李
珪曰吾子齊傳秘方能治齊來按曰脈數甚內有積熱
服阿魏丸是謂熱濟熱也渴固宜法當健脾清中才得
服參朮麴蘖等劑以正勝也或曰是在膜外藥餌不及
攻若以補助祇邪王耳何從勝嘗見一治法用朴硝填
患處火熨之令微熱若是數數為之愈矣乃依其方果

獲效在內經有之鹹以軟之者是也遂以朴硝治外而
以齋藥治內有間硝力遂頑而齋藥亦無大效也然日
羸弱自後來治者爭言補脾胃矣或曰是必針灸不然
不止江西有秀才蔡登以針名登貢來致之登曰非痞
曷針我有成藥治之當起登謂痞男必左女必右今左
耳醫者蜀王坤以為登大不省耳遂受其成藥不用而
登猶以相貌云必無他坤遂治之專主於脾胃而以雄
黃白礬膏貼之然效愈遠矣晚又治於蕭正齋正齋名

某杭人也其說李王之間而加黃著為劑者彌月卒不起嗚呼女果死於病耶抑失醫然也京師之醫盡之矣所未及者針灸然言針灸者十一故常不可耳或曰是疾成於水滯北方多有之若南還啖河中水迺有瘳訪諸人人曰非便女偶聞之遂日夜促其母歸未及歸而女死嗚呼女果死於客耶於是乎有遺憾矣自女患是疾見余日夜憂嘗進曰大人無徒苦兒有吉兆自當無恙其母扣其狀曰常夢之帝所隨一行人乞壽帝與我

脂傳唇覺而唇猶冷然唇者辰也是益我以辰矣又夢人索病與他人兒乃捧腹向曰若是寶貨便當與之此我腹中疾那得與人余聞曰仁哉果然當如女言無恙乃相與破顏而女亦驟然每晨興常如何之女應聲曰今勝於昨實不勝也察其意蓋見余頻年哭其弟妹姑謾慰之爾至於死猶云無恙言語無少亂者比病中夜嘗讀列女傳國風小學雜女記讀之間有未通即以意屬讀即不爽余竊惟其如此病既加從余乞帖學書余

曰兒女郎也何用為此遂不復事然見書即曉點畫大
都與弟妹輩講說之未死前兩日猶坐誦詩時祖母吳
夫人衣紫花半臂適來視兒褰幃曰漣漣年時衣單夏
月得寒疾今當更衣之夫人背而泣曰兒何暇憂老身
耶其死夫人尤痛悼之不已女巧慧工藝不欲書聊叙
病醫時事以識余之痛云俟他日返葬銘而藏之女諱
清姓陸上海人父深母梅氏為初舉女許配鄉進士董
君懌之仲子以丙辰臘月望前一日生以戊辰五月望

後一日死余挈之走四方居南都者三載居京師者四載云

不成殤女權厝誌銘

嗚呼吾女果死矣祭奠不得舉鄉邦水穀枕藉不得用鄉邦草木瞑目不得悼祖父諸父諸母嗚呼痛哉女乳名定桂上海陸子淵之第三女也母梅氏許配劉復之子兆元生以弘治庚申之八月廿八日死以癸亥之七月廿五日壬戌九月廿二日隨余來南都距來南都之

前一月十二日劉方問名至南都之三月十二月朔病
痘其二姊屢頻殆危兒獨不舉藥驩然就愈既愈二姊
癯然骨立兒獨豐魁日異私心喜以為厚於天者也孰
知其不足恃耶兒巧慧宛轉能得人懽心令人悼其死
不已死之日祖母臨焉余哭焉其母哭之慟且數曰不
來南雍兒或不死雖婦人之言不通於命要有傷予心
者乃杖淚誌之權厝諸都門之外謀返葬焉銘曰
歸寄有時勿震勿盡優焉游焉終安故國

不成殤兒子誌

嗚呼吾年二十有七始生汝父母賴以有子祖賴以有孫汝之生在南雍吾馳書歸報吾之故人慰之曰有子內外族人賀汝之祖曰有孫嗚呼今復何望耶汝生兩月遭汝季姊之殤吾恃汝而哭之不盡哀今汝之死也吾何恃而不哀耶又二月汝之祖母母相對病甚汝呱呱啼乳吾持汝哭而禱曰汝福德當重慶已而皆愈吾甚喜豈汝能慶及其親而不能自庇其身耶甫半周汝

祖來視祖母於南雍懷汝而喜曰貌類我貌類我回顧
乳者屬曰避風節食無厚溫也別又牽汝曰歸見汝學
步也今吾歸將何以慰汝之祖耶汝好睂目豐肌肉白
如瓠早善盼笑見者莫不懽喜提攜之汝亦不驚不懼
其親父母尤不同常兒故凡余出也目光射戶外懸懸
不見則號泣入則翼而附之如有知然弘治甲子三月
一日夜夢兒病痢甚苦求醫不來恠而覺之不敢發明
日而疾作果先腹瀉發疹不可藥九日死矣嗚呼能不

悲哉能不悲哉余將瘞汝郊之外自此去家甚邇且不
忍也汝尚未成殤不敢曰殯乃薄衾就木置諸寓舍之
外門之內俟返葬焉兒陸姓繼恩其乳名也是為誌

儼山集卷七十六

欽定四庫全書

儼山集卷七十七

明 陸深 撰

墓表

玉壺阡表

嗚呼是為吳封君之墓蓋衣冠塚云其仲子昂以山東
提刑按察副使奉命養太安人于家迨終事遂合而大
封焉太史氏表之曰天道於仁人之家深矣其始也必

有摧殘拂逆之施以寓夫遺碩存仁之意然後付之毓
賢啟祚之祥以收其繁衍食實之報或自一世二世十
世以至百世罔弗獲者蓋積之愈久則入之愈厚出之
愈遲則成之愈大若封君者可以觀已封君姓吳氏諱
寬以某年贈承德郎闕部主事以德稱太安人姓鄭氏
諱某以節稱按吳氏之先浙東人洪武初因江圯徙海
鹽之城東今為海鹽人曾祖諱添二曾祖妣沈氏祖諱
繼宗祖妣姚氏繼宗厭市喧又自城東徙邑之擊壤里

築室買田將以耕世其業考諱顯字必達號恬菴老人
行誼為鄉里所服以高年賜章服妣姚氏出平湖名族
寔生封君封君敦樸和厚未冠時遭家多故幹蠱甚力
以順適恬菴之志恬菴矜嚴少不當意即命杖杖而受
之怡然鄉人皆曰今之伯俞也待三弟務極友愛終身
無間言處內人以禮斬斬有法度其於宗黨也恪慎謙
和與物一無所競有犯之者既不與校終亦不復言人
故未嘗見其忿厲之色與叱咤之聲意淳如也年三十

有三病瘵卒寔成化乙未臘月七日壬午也太安人姓鄭氏出平湖望族年十七歸封君為繼室二十八而孀居即屏華茹淡躬勤紡績以節自苦手撫二孤命之耕讀各理昂受學於雲谷朱先生之門至以吉貝三端為束修益手所成布云逮昂起甲科馴致通顯自宜城新建咸分俸為養太安人曰祿以養廉宜留為汝助也昂既轉官留都乃來就養已自閩憲再遷魯臬陳情得請始備榮養人以為太安人善教之報越明年考終享壽

七十有八寔嘉靖乙酉三月廿二日也封君初娶于馬

逾年卒子男二長昇娶

闕

世其家傳次即昂娶

闕

學行

貞懿為時名臣女一適平湖陸滔孫男六綬紱纓緒維

闕

孫女五曾孫男十嗚呼古記稱仁孝必曰顏冉然顏

以殀終冉以疾惡疑於天道若難知者然德成名立萬

世如新死生修短之間此正天道之所以為大也初封

君病狀殆方書所謂傳尸癆者俗傳妨後故尤諱之必

燬遺乃已當時憲副君才二齡耳太安人每語之故憲

副君必號慟攀慕決日不能休歲時饗祀則躡踊再三
曰昂無父之人也聞者莫不悲之及茲同壙鬱成嘉阡
人皆曰憲副君之知禮也深故特表之使樹之隧上以
告凡世之遭變思復者若此太安人遺行復書之碑陰
以代銘詩曰甲令凡節婦有終應得旌門太安人及格
五清先生劉公瑞自翰林來督學政風有司具上太安
人聞之曰守志撫孤婦之道也已被封典敢邀再命乎
命昂力辭之每歲時必帥二孤上鄭公之墓為置祭田

紡績之工至老不倦每歸寧舟行往返必以木綿車自
隨衣必澣濯破裂必為之補綴一布被五十年猶存每
舉以示孫曾曰此阿漣嫁時物也姚孺人有幼女曰菊
英卒時囑之曰新婦母之太安人撫育如已出長嫁之
如禮叔母韓暴卒後具索然太安人即檢自製者終之
其仁孝若此又曰此吳氏之世澤也凡吳之後人宜世
世知之宜世世保之作玉壺表

晉國夫人院氏墓表

蓋聞聖人御寓睦九族以展親君子好逮歌小星而弘
化是以乾坤之位列則歲功順成綱常之分定而家邦
並理斯古今之通義也乃若發潛隱之德而光以上行
屬綜核之朝而名匪例及孝敬之風翕然存歿之榮有
耀則未有若夫人之盛者也夫人姓院氏太原忻州人
父文舉母某氏今晉王殿下之淑媛也德工言容恩寵
佐贊俱為宮壺冠以嘉靖十年辛卯六月十一日卒享
年四十有三由薨子不舉故也是時王世嫡尚虛尤痛

惜之即馳傳上言于今上皇帝臣母妃彭以宗支事重
博選名德親以院氏屬之臣曰是可助內也宜蕃胤嗣
以延我統系臣頓首承命惟謹暨臣母妃之屬續也又
以院氏屬之臣曰是真孝婦也宜請封號以勵其餘人
臣稽首受命惟泣身在笄笄蓋有待也今不幸故於孕育
臣上無以副母妃之遺言下無以顯侍承之潛德敢昧
死以聞事下禮部禮部尚書臣某等上言曰禮緣人情
例以起義徵之典故宜有以慰王者章再上皇帝若曰

孝敬之道大可贈為夫人嗚呼蓋特恩云前後無是也
自今觀之名器所以彰德也恩澤所以辨才也死生所
以定論也雖然必有遭焉非天子之聖何以舉格外之
典非賢王之仁何以隆逮下之恩非夫人之賢又何以
懋交孚之應嗚呼休哉夫人賦性恬靜英姿婉婉自少
寡默弘治十年禮選入府迨長事王恭慎有度上奉母
妃益加勤畏妃甚賢之妃屬疾夫人入侍蚤暮不敢離
榻前序進湯藥王親嘗之夫人亦親嘗之由是孝誠感

格宮中之務悉倚辦焉夫人益修祗恪手製冠服親調
飲膳下至茶果藥餌之類無一不致誠潔恒兢兢然而
外政了無干預人尤難之仙遊之日府中宮中無老無
少無賢無不肖無不嘖嘖流涕以為夫人之惠未究於
世也弔者祭者持紙錢者以手加額者相屬於道而王
亦益悲思之嗚呼茲夫人之賢也而亦夫人之遭也可
無憾矣深昨備員晉臬有學政嘗以六月十有八日隨
三司後入賀殿下千秋之壽具見品儀則筐篚織纊之

文組繡鞶織之麗充庭耀目有指者曰是院夫人之勤也相與稱歎既得罪去再至而夫人玄堂之期告矣嗚呼悲夫既而左長史馬君朋奉狀來請文其實以備閭範使後有考焉故特為之以侈皇上睦族之化以彰賢王懷賢之德併以慰夫人之靈於不朽云

東石毛府君墓表

嗚呼我皇明之文盛矣徧海寓皆知誦經摘文以起家科第為賢父兄以是教其子弟子弟以是事其父兄匪

是則為愚為不肖為弱不能振其宗蓋自窮鄉下邑已
然而兩浙為盛浙之東寧紹為盛紹之餘姚為又盛彬
彬乎蓋十室而五六矣雖然顯揚經濟之志或不能勝
其富貴利達之心蓋又不獨一郡邑已然也予頃觀察
兩浙渡姚江得一人焉曰東石毛本之是已其子復成
進士名而東石即謝世復宴瓊林後二十日自京邸聞
訃蓋公不欲食其報於子而復為顯揚之圖者伊始况
具有經濟才如復者乎蓋其為學為訓已盡出風氣之

外顧非豪傑士哉予為題其墓曰餘姚毛府君云府君諱明本之其字也別號東石學士大夫又推尊之曰東石先生善有子也東石自幼力學甫成人即遭存守翁之喪事母鮑孺人奉大母徐曲有禮愛諸叔少孤捐私廬創田宅完然居之又撫諸弟以成立辛苦支吾遂廢舉子學築室東石之麓鑿池養魚引水澆花自適也大意教其子以明體適用不屑為世俗之學暇則觴咏為樂復領鄉薦作詩示之其佳句曰開軒慕三益閉戶尋

九思辛卯秋忽不喜飲酒復私憂之作迎醫侍養計不
欲赴會試東石微知之復作詩示之曰孟子非大儒三
遷成底事復不敢留乃諭之曰人之生世有子為不死
有文為不朽汝能登第我即死必有海內能文之士表
我我可託之不朽矣汝勉之復奉遺言走東海以請茲
豈非豪傑士哉東石配貞懿孺人鮑先三十年卒子二
長即復娶錢氏次師繼室錢出娶陳氏女二樂安王嫌
匡山羅袍其壻也孫十曰五采曰五美曰五英曰五倫

曰五善曰

闕

壬辰之冬合于貞懿而封焉墓在湖杭

渡山之陰予為論次其世而詳書其系以告後之人

金齒何氏墓表

予讀詩至瓜瓞作而歎曰古人之仁也何其明於本也
及讀世本史記諸書作而歎曰古人之義也何其嚴於
辨也夫不辨則不類不知所本則易於忘是生人之道
幾乎熄矣生人之初原於一人所居不過一方暨其末
也漸繁而漸遠又其別族變姓授氏錫爵已不能守宗

統之舊况於遷避流播之勢百出而無窮是故不特至於途之人而已也金齒何生偉來遊太學卒業歸以先世狀請表於墓予益重其知禮焉按何氏本出浙之烏程國初編戎金齒故金齒有何氏諱迪字惟吉者寔何氏始遷之祖有令德以書數稱配石氏繼沈氏生一子諱滿字公退繼戎籍忠謹號稱長者配陶氏生三子曰勝宗曰敬宗曰德宗勝宗字用光復以能書用於有司多託於酒以自適配劉氏敬宗字用恭以孝友稱於鄉

配胡氏德宗字用本有膂力多巧思時金齒初設學用
本為諸生尋以養母歸與其配錢氏力豐其家而金齒
之何始大矣勝宗有子曰仲瑛敬宗有子曰璟德宗有
子曰嶽仲瑛輸粟拜官璟亦嘗為諸生嶽勤敏剛果益
充其家而行義亦益大偉其長子也偉舉雲貴庚午鄉
試勵行而績文何之後揚將於是乎在偉嘗請間泣而
告曰偉也幼先世之遺行美矣而不及知知矣不及詳
竊聞之先祖妣錢與伯祖妣劉孀居時與胡孺人同爨

處者餘三十載更相敦睦終始無間言三大母繼沒又
十餘載以食指衆而析析焉而意未嘗不合也然得之
曾大母陶清範慈教為多云嗚呼此何氏之祥也自古
家國之所為隆替者其始也未有不由於女德其終也
未有不成於子孫其積累之難也動以世計其傾墜之
易也或以旦旬達於天下一也偉乎尚勉之哉使歸而
刻諸石以示永永

儼山集卷七十七

欽定四庫全書

儼山集卷七十八

明 陸深 撰

行狀一

勅贈承德郎刑部主事松雲沈公配封太安人
謝氏行狀

松雲府君卒既葬之五年獲贈官刑部主事又四年其
子員外郎恩始克以品官禮改葬於長溪鳳皇之原初

府君以盛年背養其配太安人謝囑其子曰汝為雙壙以待及是卒於天津旅寓謀奉以歸啟而大封焉正德元年夏恩以例得歸省遂營改葬事已而復奉太安人就養於京而連遭婚喪事遂不得行既行而太安人疾作禱于淮卜于徐醫于齊魯衛之間遷延者數月竟不起而恩竟坐違詔肯免官人咸憐之先是府君之葬既有銘矣因改而廢而茲合葬弗可以闕深與恩士同學官同朝且又世世姻婣聞府君太安人之風習矣故敢

為狀以請按府君諱鎡字時用號松雲其先嘉禾楓涇人高祖諱居仁元季避兵因家上海曾祖諱德弘祖諱晟考諱環是為梅月翁妣尹氏府君初娶于談產一女而殀繼娶太安人謝氏諱貞字永慕以子貴至是竟同穴云府君之卒也卒於家以弘治丙辰十二月望日壽止四十有七其子方舉進士於朝不及見太安人之卒也卒於客以正德丁卯十二月十日壽止五十有四其子侍焉人咸惜其壽不滿德云府君少聰敏以單傳故

不為仕學弱冠遊杭有鄰女挑之亟遷居以避其自幼
端潔如此年二十三喪梅月翁喪葬一如禮而家稍歛
太安人助之經營數年遂致千金之產自是舉義睦宗
能世其家外祖母某老無嗣為迎養于家日招鄰母之
賢者相與談笑以悅其心既歿喪葬任其費且半諸甥
庶弟某已異爨矣長弗能婚乃厚為之聘諸父有葬者
為營其墓道費過百金竟不出一德語年三十二喪母
復如禮鄉人有負粟至千斛錢至百緡度弗能償悉焚

其券時有亡奴為盜者執而諭以義竟遣之施棺掩骼成橋濟涉殆無虛日而向之所致千金屢空矣市有樓一區既售太安人曰十年成之一旦棄之不可顧吾兒後業也遂傾糶匱贖還後卒以讓其宗黨其行誼皆此類也太安人出邑舊族幼孤鞠于外家翟氏靜莊儉孝尤精女工紡績織紵常至夜分其養祭尤竭力稱其為府君配也恩既第進士府君攜家來京師是日適初度恩戒客上壽府君喜動顏色曰吾上世無仕宦始發於

吾兒祖宗之積也雖貧吾願足矣三閱月而南還還二月而不起太安人就養長安者五載遂及封云子一即恩刑部員外郎女二長即談出適陸淮深之從兄也早卒次適韓惠孫女三長適孫天相次許聘張寶忠次尚幼卜以某年月日奉窆恩嘗泣向深曰更延吾父十載延吾母五載於天如何是雖一時逼切之言然封君太安人生既有德沒又有後修短之數似有不足憾者矣惟君子賜之銘焉庶託於不朽也

奉訓大夫尚書禮部精膳司署郎中唐君行狀
君諱禎字原善世為華亭人居白沙里自高祖而下皆
弗耀至君始以科第起家故白沙之唐日益以大君自
少穎敏淳謹年十二三即知讀書綴文鄉先生宋冬官
克輝時致仕家居以經授徒號博學持鑑勁節公以君
往見宋目而器之留置門下既又從張先生士欽學舉
子業尋與張同登進士鄉里奇之君家故饒迨君一無
紉綺習常寓居百里外讀書以一僕自給見者謂為寒士

也由金山衛學生領成化癸卯科應天府鄉薦丁未科
釋褐高等觀政某部會憲廟升遐宗伯特選文學之士
分遣天下編纂實錄君赴浙江至之日鎮巡官以賓禮
逆君君往答焉時鎮守者故閉中門欲誑君從旁入君
下馬南面立取刺授門者入達即上馬去識者以為婉
而得體書既成事多入國史尋賜告歸無何居何安人
之喪哀毀有禮丙辰歲服闋還朝拜兵部車駕司主事
明年聞勁節之訃匍匐歸治喪既襄事復還朝改禮部

儀制司儀制掌四方封事君每閱佳疏輒口誦之有太
激切者為之歎曰言固當如是耶精膳每歲新茶進御
必先至司驗視附其餘為饋曰樣茶者分餽僚友以為
常君揆諸心曰焉有上供之物人臣敢私嘗耶乃戒諸
門者每茶至必執策數而入之無容入其餘驗既復執
策數而出之如其入焉由是樣茶遂絕乙丑陞主客員
外郎主客所轄皆四裔情狀不一號稱難治君一一調
度皆得體時哈密貢方物麤惡倍常數覲優給君悉閱

折之其人譁諸庭累數日不伏曰吾主方物皆有數今
乃爾歸必抵罪君徐曰爾主將罪爾耶吾以尚書一咨
關吾邊將以尚書一咨諭爾主如何衆皆愕然不敢動
蓋其物之麤惡者皆其使之在途潛易也君機敏類如
此尋陞精膳郎中蒞事數月而疾作竟不可治以卒於
長安寓舍時丙寅四月八日也君平生篤於天倫奉二
親極孝與兄祚相友愛甚篤與人交不立城府然未嘗
不儼然也其為學不為章句文辭好識前言往行博洽

體法所繫嘗借予皇明政要手抄未畢而卒云嗚呼天之生成不偶然也如公之才十不試一二而竟齋以沒抑又何哉深初登第與君鄰寓且有嫺故辱君不鄙每公餘即過從談議故畧得數事竊識之茲將歸葬於祖塋禮也夫為善而不獲其成苟併所存而泯焉卒亦何賴敢為狀以陳伏乞大人先生刪次為銘聊以慰君於地下也君生天順戊寅四月下至卒得壽五十凡三娶初劉氏再陳氏再王氏子男三長曰儒松江府學生娶

張氏次曰侃劉所生也息女三長適府學生戴恩次許
配宋公選即克輝冢孫君蓋不忘所自次一女一男皆
幼側室王氏出云

思巖唐公行狀

公諱啟字世明別號思巖裔出子方晉陽靈石人也吳
元年有諱英者官上海烏泥涇稅課局大使遂占籍焉
英生福福生俊俊生昭皆有隱操昭生瑜舉進士由給
事中歷官至右副都御史為憲廟時名臣瑜生鉞以太

學生歷官至南京後軍都督府都事生三子公其仲也
公生至性孝友和厚儀觀清麗存心正直樂易自如見
之者咸敬公公敬人亦無苟者有大才諳練世故通曉
時制篤學力行遂成名士時有以粟入監例由此途進
者濟濟公獨不屑將期大成而與時忤遂躋不振然其
江湖之憂時發諸議論聽者竦然若其表正鄉里一念
尤其拳拳者故遇人有過輒面折之弗諱焉又節儉不
妄費用能自樹家業奉親極豐故都事公宦遊以豁達

稱由公能養志也母余孺人素羸病公事之益謹每樂就公養而不欲宦從既以壽終公哀毀殊切凡歛葬具悉力營辦服甫闋而都事公之訃又至矣公不覺失聲號泣即徒跣南都扶柩以歸時語人曰天乎何困人若此吾大父中丞公忠諒廉直實清白吏而未食其報冀吾父必達而祿秩止此意蒼蒼者尚留餘之福於吾後人遂刻意訓子迎師取友實皆義方之計其事伯兄千戶公隆尤篤禮意待弟政不失以恩故邑中稱公孝

友無間云享年四十有七邇公之生以成化乙未十月十七日以正德辛巳十月二十四日終于正寢配梅氏有賢行公德其幹相力敬愛特至子承宗讀書識義克續公緒承宗娶倪氏生女一公卒邑人莫不惜公以坦夷仁誠而弗壽豈造物之理有不可測者耶嗚呼傷哉

沈孝子行狀

孝子姓沈諱輔字良弼別號菊軒蘇之嘉定人也孝子幼有至性奉親曲盡孝道成化丁亥歲孝子嘗出郡母

孺人黃盛暑中癰發于頸既決壞莫可治孝子忽心動
汗流驚曰得無吾父若母恙乎即日趨二百里餘歸已
無及于救矣哭踊絕水粒者三日及至葬會天久雨成
潦孝子先一夕率其配瞿泣血拜雨及期果霽既襄事
而雨復作如舊辛丑歲思善府君病腹痢醫藥罔效孝
子復率瞿禱于庭願減已筭以益父年拜至額瘡忽聞
異香滿室思善遂瘥同邑潘郎中時陽作傳行其事錢
文通公溥吳文定公寬夏少卿寅張給事寧沈石田周

皆有紀述由是孝子之誼寔聞於人人遂聞于御史御史聞于天子天子下其事於府若縣覈實以聞天子若曰是不可以不勵爰旌其門於是大書華扁幾與節孝之徐義門之鄭等矣故一時吳越之人皆稱之曰孝子而不名云孝子之先為鳳陽人有諱都遠者登宋進士第仕於揚州會元兵渡江復仕於蘇夜夢雙虎黝然據獄厥明入獄果有兩男子荷校者察其有異陰縱之即張瑄朱清也尋罷官寓蘇之烏鵲橋後瑄清以海運有

功並都通顯一日遇諸途遙拜曰吾父吾父即奉以歸
清浦清浦瀕海帶江號沃壤因樂其地遂卜居焉是為
沈氏南遷之祖也都遠生元震元震生觀光觀光生姦
姦生璞璞生麓樂善好施是為思善府君孝子之考也
至是七傳矣而家益以大族益以昌美宅良田凡若干
區而詩禮之聲益以盛登科賜第聯歲而有若孝子者
猶之於沈氏可謂有德有功之祖矣嗚呼盛哉孝子幼
穎敏能讀書長涉獵書史尤好法書名畫古物器尤善

鑒定種菊滿庭以娛親悅賓因以自號雅歌投壺與文
墨士相周旋而彈絲吹竹家富聲樂其習尚如此性好
施與凡親之黨貧乏者惠之患難者拯之凡鄉之人則
葬其死而貧者婚嫁其失時者樂其病者橋梁其病涉
者修菴觀之傾者壞者殆無虛歲族叔有諱軒者無後
則養其生送其死甚厚徐氏姊少寡則撫其孤勵其志
卒以節完天順辛巳歲海溢遭漂溺者三千餘家則輸
粟四百斛於官賑之成化壬寅歲吳饑又輸粟五百斛

獲章服之榮又輸粟若干於邊應格當復得一官因以
讓其兄某弘治辛亥歲吳復饑又輸粟一千二百斛獲
旌門之榮弘治壬子歲夏旱又請于官輸種豆六百斛
于民賴以有秋弘治戊午歲又焚逋券若干通其行誼
如此尤為鄉人敬服至於縣大夫亦多材之質成于門
者無虛日天順癸未甲申間鹽徒為寇孝子設法擒送
于官一境晏然其材制如此弘治己酉有司舉充鄉飲
賓戊午長孫焰登京闈鄉試辛酉孫灼復登明年壬戌

焰登進士第乙丑例被上賜有綿纈米肉復有冠帶其
遭際如此生於宣德甲寅六月二十二日卒於弘治乙
丑十二月初八日得壽七十有二卒之時其孫焰灼皆
以朝命便道還家侍疾惟謹既屬纊戒諸子孫於庭曰
人數有限吾本布衣屢被恩榮夫復何憾但鄉人忘吾
之惠累致於訟雖然不可因此而怠其為善之心也勉
哉耕讀吾家業爾其壽而終終而不亂如此子男四人
長曰梁娶龔氏次曰崇娶黃氏次曰棣先卒娶黃氏次

曰槩娶楊氏孫十四炤今官行人娶闔氏燿庠生娶徐氏顧氏灼娶唐氏燧娶譚氏勲娶錢氏煦庠生娶唐氏煥庠生娶曹氏休烈燾燭燂孫女十四德清適庠生陳金德莊適徐倬德真適郭指揮乾德寧適徐孔麟德溫適上海庠生諸華德柔德良德英德馨德芸德和德潤未行曾孫一未名曾孫女七俱幼其肩嗣如此夫孝之德廣而義之道安前則有光後則有啟生則有享死則有譽若孝子可不謂聖世之耆逸也哉是宜以有傳

茲將以某年月日奉寔于崇孝之阡惟當世之宗匠叙
次為銘庶以慰諸幽而徵諸明也深外曾祖母實瞿孺
人之姑則深視孝子祖黨也又獲與諸孫炤灼同朝而
灼為同年家且鄰比焉是故撫其大者為狀以俟

儼山集卷七十八